

四庫全書

經部

欽定四庫全書

經部  
讀禮通考卷八十八

詳校官監察御史<sub>臣</sub>劉湄

給事中<sub>臣</sub>溫帶綬覆勘

總校官編修<sub>臣</sub>王燕緒

校對官典簿<sub>臣</sub>郭祚燾

謄錄監生<sub>臣</sub>鄧友桎

欽定四庫全書

讀禮通考卷八十八

刑部尚書徐乾學撰

葬考七

山陵一

三秦記秦謂天子墳曰山漢云陵亦通言山陵言高

大如山如陵

太昊伏羲氏

帝王世紀葬南郡

九域志單州有伏羲冢

路史葬山陽

注帝冢在山陽  
高平襄陽之境

文獻通考葬宛丘

註在  
陳州

女媧氏

戴延之西征記潼關直北隔河望層阜巋然獨秀謂  
之風陵此是女媧墓

柳芳唐歷風陵天寶十三載五月失之乾元元年六  
月一日復出

太平寰宇記閩鄉津去閩鄉縣三十里即舊風陵關  
有女媧墓自秦漢以來皆繫祀典唐乾元二年虢州  
刺史王奇光奏所部閩鄉界女媧墓天寶末失其所  
在今月一日夜河上側近忽聞風雷聲曉見墓湧出  
上有雙柳樹下有巨石其柳各高丈餘

元和郡縣志女媧陵在任城縣東南三十九里  
城冢記女媧墓有五其一在趙簡子城東五里

羅革路史註女媧墓一在晉之趙城東南五里高二

丈皇朝列祀於此

隆平集乾德四年詔置守陵五戶春祀少牢

炎帝神農氏

帝王世紀葬長沙

郡國志神農氏葬長沙長沙之尾東至江夏謂之沙

羨今郡有萬里沙祠

路史炎帝崩葬長沙茶鄉之尾是曰茶陵所謂天子

墓者有唐嘗奉祠焉

路史註茶陵今在麻陂林密不可入石麟石上兩杉  
蒼然逾四十圍其上陵也前正對紫金嶺五行書云  
神農丁亥日死丁未日葬

文獻通考淳熙十四年衡州守臣劉清之奏史載炎  
帝陵在長沙茶陵今衡州茶陵縣是也陵廟皆在康  
樂鄉白鹿原距縣百里而祠宇廢祖宗時給近陵七  
戶守視禁其樵牧宜復建廟給陵戶禮官請如故事  
命守臣行之

名勝志史記炎帝葬于茶山之野茶山即景陽山也  
以陵谷間多生茶茗故名在茶陵州治東高一千五  
百丈周迴百四十里茶水發源山北流瀧下十里合  
白鹿泉水以入於洙水經洙水出茶陵縣上鄉西北  
過其縣西地理志謂之泥水也白鹿原去州南一百  
里炎帝墓在焉

炎帝陵在酃縣常樂鄉舊傳宋太祖嘗夢一大人執  
火頂笠既覺問之羣臣曰此炎帝也遣使往南問之



至橋梁嶺遇一老人指示陵所遂勅有司立廟祀焉  
額曰福濟陵前有古杉一株今只存半長一丈餘尚  
作凌空之勢又有樟木橫亘水中枯空若洞所謂空  
樟洞也有河澗源自珠山分流遶陵廟而過中有游  
魚人莫能取岸側多生白楊每遇花時紛開如雪然  
黃帝軒轅氏

皇覽黃帝冢在上郡橋山

括地志黃帝陵在寧州羅川縣東八十里子午山

元和郡縣志子午山亦曰橋山在真寧縣東八十里  
黃帝陵在山上

九域志橋山漢地理志云在上郡陽周縣南風土記  
云陽周縣南有黃帝陵陵在子午山上

路史註案混天記黃帝葬南陵山神鑑黃帝葬南甲  
山思立賦註黃帝葬西海橋山

朱彞尊曰史記黃帝崩葬橋山皇覽謂在上郡地理  
志謂是上郡同陽縣括地志謂在寧州羅川縣今平  
谷有黃帝陵人多疑流傳之誤然帝既都涿鹿則  
葬於此理亦有之抑衣冠之葬或者非一處也

乾學案軒轅陵在橋山載紀所同特橋山匪  
一上郡媯州皆有之漢武帝元封元年帝北  
巡朔方勒兵十餘萬還祭黃帝家橋山此上  
郡之橋山也北魏明元帝神瑞二年六月丁  
卯南次石亭幸上谷壬申幸涿鹿登橋山觀  
溫泉使使者以太牢祠黃帝遂至廣寧泰常  
七年九月幸灋南遂如廣寧幸橋山遣使者  
祠黃帝因東幸幽州太武帝神䴥元年八月

東幸廣寧臨觀溫泉以太牢祭黃帝此媯州之橋山也郭景純注山經云帝王冢墓皆有定處而山經往往複見蓋聖人久於其位仁化廣及至於殂亡四海無思不哀故絕域殊俗之人聞天子崩各自立位而祭起土為冢是以所在有焉景純之論可謂善言古者矣後之讀史者偏執成見以史記為是必以魏書為非然黃帝既都涿鹿安在媯州之不可

營葬也乎

少昊陵

遁甲開山圖葬雲陽

路史註在今茶陵之露水鄉攸縣界

明一統志少昊陵在曲阜縣

名勝志曲阜縣東北二里有壽丘今改壽陵少昊陵在壽陵東前有石壇石像極其工巧又有八卦石

乾學案宋乾德中下詔申先代帝王陵寢樵

采之禁分設守陵戶或春秋祠或歲一饗或  
三年一祭著於甲令獨不及少昊陵其祭於  
兗州盖自金始若諸家地志則自元以前均  
莫之載也

顓頊陵

山海經務隅之山帝顓頊葬于陽九嬪葬于陰

註家  
今在

濮陽故帝丘也一曰顓  
丘縣城門外廣陽里中

附禹之山帝顓頊與九嬪葬焉丘方圓三百里丘西

有沈淵顓頊所浴

水經註淇水北逕白祠山東歷廣陽里逕顓頊冢西俗謂之殷王陵非也帝王世紀曰顓頊葬東郡頓丘城南廣陽里大冢者是也

元和郡縣志顓頊陵在頓丘縣西北三十五里

輿地廣記濮陽縣鮒鰭山帝顓頊所葬

十道志鮒鰭即廣陽山之別名

郡國志顓頊葬處俗名青冢山

崔鴻前趙錄光初四年將於霸陵西南營壽陵侍中  
喬豫和苞上疏諫曰臣等伏聞勅旨營建壽陵周圍  
四里下深二十五丈以桐為棺槨黃金飾之臣聞堯  
葬穀林市不改肆顓頊葬高陽下不及泉聖王之於  
終也如是

路史註帝陵在相州臨河乾德四年置守陵戶高陽  
在臨河九域志順安高陽縣有顓頊陵縣故臨河濮  
陽與相出入也至顏真卿吳地記烏程有顓頊陵則



非矣

帝嚳陵

山海經狄

一作秋

山帝嚳葬于陰

註今冢在頓丘縣城南臺陰野中也

皇覽帝嚳冢在東郡濮陽頓丘城南臺陰野中

帝王世紀帝嚳葬東郡頓丘廣陽里

水經註淇水逕雍榆城東北帝嚳冢西世謂之頓丘臺非也皇覽曰帝嚳冢在東郡濮陽頓丘城南臺陰野中者也

元和郡縣志頓丘西北三十五里有秋山縣北三十里有帝嚳墓

太平寰宇記秋山在頓丘縣西北三十五里帝嚳葬於山陰今陵見存

路史帝葬頓丘臺城陰野之秋山所謂頓丘臺也  
路史註唐以仲春祀帝嚳于頓丘三年一享

帝堯陵

山海經狄山帝堯葬于陽

註今陽城縣西東阿縣城次鄉中赭陽縣湘亭南皆

冢有堯

墨子堯北教乎八狄道死葬鞏山之陰衣衾三領穀木之棺葛以緘之既訖而後哭滿塹無封已葬而牛馬乘之

呂氏春秋堯葬于穀林通樹之

高誘註通林以為樹也

帝王世紀堯崩葬于濟陽之成陽西北是為穀林

元和郡縣志堯陵在雷澤縣西三里貞觀十一年詔禁人芻牧春秋奠酌

漢成陽靈臺碑畧惟帝堯母慶都氏姓曰伊歿葬於  
茲欲人莫知名曰靈臺上立黃屋堯所奉祠

水經註地理志曰成陽有堯冢靈臺今成陽城西二  
里有堯陵陵南一里有堯母慶都陵於城為西南稱  
曰靈都鄉號崇仁邑號修義皆立廟四周列水潭而  
不流水澤通泉泉不耗竭至豐魚笋不敢採捕前並  
列數碑枯栢數株檀馬成林二陵南北列馳道逕通  
皆以磚砌之尚修整堯陵東城西五十餘步中山夫

人祠堯妃也石壁塔墀仍舊南西北三面長櫟連蔭  
扶疎里餘漢建寧四年五月成陽令管遵所立碑文  
云堯陵在城南九里中山夫人祠在城南二里東南  
六里堯母慶都冢考地驗狀咸為疎僻蓋間疑書疑  
耳

歐陽修集古錄案皇覽云堯冢在濟陰城陽呂氏春  
秋云堯葬穀林皇甫謐云穀林即成陽然自史記地  
志及水經諸書皆無堯母葬處惟見於此碑蓋亦葬

成陽也

趙明誠金石錄成陽屬今雷澤歐陽集古錄謂史記地志及水經諸書皆無堯母葬處案班固西漢劉昭東漢書地理志皆曰成陽有堯冢靈臺而東漢志章帝元和二年東巡狩將至太山道使使者奉一太牢祠帝堯於濟陰成陽靈臺與章帝紀所載正同帝紀章懷太子註引郭緣生述征記云成陽縣東南有堯母慶都墓上有祠廟俗亦名靈臺文母水經註今成

陽城西二里有堯陵陵南一里有堯母陵於城為西南稱為靈臺蓋兩漢所載似以靈臺為堯冢惟此碑與述征記水經迺直指為堯母冢爾然水經云在成陽西南而述征云在東南未知孰是

洪适隸釋兩漢地志濟陰成陽有堯冢靈臺不明言靈臺為堯母冢也章帝紀元和二年使使者祠唐堯於成陽靈臺注引郭緣生述征記曰成陽有堯陵南一里有堯母慶都陵稱曰靈臺據此與碑合靈臺非

堯冢明矣

路史堯之冢在今濮州之雷澤東南而王克乃云葬  
崇山墨子則謂北教八狄道死南已之市而葬鞏山  
之陰蓋儀墓爾郭緣生述征記成陽城東南九里有  
堯陵郭氏所記乃小成陽在成陽西北五十里隸於  
河南有山曰成陽穀林在其下小成陽以山得名乃  
堯葬所在

帝舜陵



檀弓舜葬于蒼梧之野蓋三妃未之從也

註舜征有苗而死因

留葬焉

疏此論古不合葬淮南子云舜征三苗而遂死蒼梧徙猶就也三妃不就蒼梧與帝合葬也

山海經蒼梧之山帝舜葬于陽帝丹朱葬于陰

註即九疑

也山

赤水之東有蒼梧之野舜與叔均之所葬也

南方蒼梧之丘蒼梧之淵其中有九嶷山舜之所葬

在長沙零陵界中

注山在今零陵營道縣南其山九嶷皆相似故云九疑古者總名其

地為蒼梧也

墨子舜西教乎七戎道死葬南己之市衣衾三領穀

木之棺葛以緘之已而市人乘之

呂氏春秋舜葬于紀市不變其肆

註九疑山下亦有紀邑

史記舜崩于蒼梧之野葬于江南九疑是為零陵

元和郡縣志九疑山在永明縣東南一百里舜所葬也九山相似行者疑惑故為名二妃冢在華容縣北一百六十三里青草湖上

拾遺記舜葬于蒼梧之野有鳥如雀丹州而來吐五色之氣氤氲如雲名曰憑霄雀能羣飛銜土成丘墳

此鳥能反形變色集於峻木之上在木則為禽行地則為獸變化無常游丹海之際時來蒼梧之野銜青砂硃積成壑阜名曰珠丘其珠輕細風吹如塵名曰珠塵

方輿勝覽檀弓云舜葬於蒼梧之野習鑿齒云虞舜葬零陵元和郡縣志亦云九疑舜之葬也案太史公曰舜南狩行死於蒼梧之野歸葬於江南之九疑山海經云舜之所葬在今道州零陵縣界蒼梧九疑當

是兩處後人誤引舜死之地以為舜葬之所耳

元混一方輿勝覽舜陵在女英峯下

羅泌曰孟子曰舜生於諸馮遷於負夏卒於鳴條諸馮負夏鳴條皆在河南北故葬於紀所謂紀市也今帝墓在安邑而安邑有鳴條陌其去紀纔兩舍帝紀言河中有舜冢信矣其言舜葬蒼梧則自漢夫之李白詩云重瞳孤墳竟何似則虞舜之冢不明自昔以為憾也

大禹陵

墨子禹葬會稽衣衾三領桐棺三寸葛以緘之絞之不合道之不塹土地之深下不及泉上毋通臭既葬

收餘壤其上壟若參耕之畝

呂氏春秋禹葬于會稽不變人姓

註言無所興造不擾民也

淮南子禹葬會稽之山農不易其畝

越絕書禹葬會稽葦椁桐棺穿壙七尺上無漏卮下

無卽水壇高三尺土階三等延袤一畝尚以為居之

者樂為之者苦無以報民功教民為田一盛一衰當

禹之時舜死蒼梧象為民田也禹至此者亦有因矣

吳越春秋禹周行天下還大越登茅山更名曰會稽

鳳凰棲於樹鸞鳥巢於側麒麟步於庭百鳥佃於澤  
將老命羣臣曰我百世之後葬我會稽之山葬之後  
無改畝禹崩衆瑞並去天美禹德而勞其功使百鳥  
還為民田大小有差進退有行一盛一衰往來有常  
皇覽禹冢在會稽山上

水經註會稽山上有禹冢昔大禹即位十年東巡狩  
崩於會稽因而葬之有鳥來為之耘春拔草根秋啄  
其穢是以縣官禁民不得妄害此鳥犯則刑無赦

括地志禹陵在越州會稽縣南十三里廟在縣東十一里

九域志禹陵在會稽山上有禹井

金石錄漢窆石銘永建元年五月唐禹穴碑鄭魴序  
元稹銘韓曄材書寶曆二年九月立

會稽志禹陵窆石遺字直寶文閣王順伯復齋碑錄  
定為漢刻舊經云禹葬於會稽取此石為窆

演繁露漢地理志會稽郡山陰縣註云會稽山在南

上有禹冢禹井今紹興府城東十許里有告成觀觀  
有禹廟相傳禹墓在廟東之小山山下又有窆石或  
云禹葬所用然絕無信傳又其地自在山陰縣治之  
東與古傳在南者方鄉不應若紹興府府治則又在  
今山陰縣之西而其正南大山即秦望山也秦始皇  
父子皆登此山以祭禹矣南史紀秦碑至是尚在讀  
二世碑是也然則禹墓在秦望山上山陰縣南而不  
在告成觀甚明



元混一方輿勝覽禹穴在龍瑞宮之側

孔甲墓

明一統志在永寧縣東北三峭山

夏后皋墓

左傳蹇叔曰殽有二陵焉其南陵夏后皋之墓也

註皋

桀之  
祖父

水經註石峭水出石峭山山有二陵南陵夏后皋之墓

元和郡縣志二嶠山又名嶺崙山在永寧縣北二十  
八里

輿地廣記永寧縣西北有二嶠山連入硤石界其南  
夏后皋之墓也

成湯陵

皇覽湯冢在濟陰亳縣北東郭去縣三里冢四方方  
各十步高七尺上平處平地漢哀帝建平元年大司  
空御史長卿案行水灾因行湯冢

水經註崔駰曰湯冢在濟陰亳縣北皇覽曰亳城北  
郭東三里平地有湯冢冢四方方各十步高七尺上  
平也漢哀帝建平元年大司空史邵長卿案行水災  
因行湯冢在漢屬扶風今徵之迴渠亭有湯地徵陌  
是也然不經見難得而詳案秦寧公本紀云二年伐  
湯三年與亳戰亳王奔戎遂滅湯然則周桓王時自  
有亳王號湯為秦所滅非殷湯矣劉向言殷湯無葬  
處為疑杜預曰梁國蒙縣北有薄伐城城中有成湯

冢今城內有故冢方墳疑即杜元凱之所謂湯冢者也

元和郡縣志殷湯陵在寶鼎縣北四十三里

太平寰宇記殷湯陵在蒲州寶鼎縣北四十三里後魏太和中縣人張恩破陵求貨其陵下先有石弩以銅為鑠盜開埏門矢發中三人皆斃恩更為他計卒取得墓中物其物多是鍾磬及諸樂器得其銘恩恐人知以銘投之汾水後事泄為主司所理乃於水

次取得其銘銘曰吾死後二千年終困於恩由是執  
事不復深加其罪劉向云湯無葬地蓋不練其處也  
隆平集乾德四年詔給守陵五戶蠲其役仍令長吏  
春秋奉祀

明一統志在滎縣北四十里元癸未歲淪于河  
太戊陵

文獻通考葬大名內黃縣東南

隆平集乾德四年詔給守陵三戶歲一享

明一統志在內黃縣南三十里

高宗陵

白衮魯國地記吳阪之下使得隱穴旁入三里穹窿  
蒙密傳說之所讚武丁之所墓

九域志商高宗陵在淮寧府西華縣北

隆平集乾德四年詔給守陵三戶歲一享

周王季墓

論衡王季葬于滑山之尾藥水擊其墓見棺之前和

文王曰嘻先君必欲一見羣臣百姓也夫故使樂水見之於是也而為之張朝而百姓皆見之三日而後更葬

### 文王墓

括地志文王墓在雍州萬年縣西南二十八里原上雍錄孟子曰文王生於岐周卒於畢郢畢之為地或云在渭之北或云在渭之南其主渭北者則漢劉向言文武周公葬於畢而師古釋之曰在長安西北四

十里即咸陽矣故元和志曰咸陽縣治畢原也此皆以畢為在渭北者矣至其命為渭南者皇覽曰文武周公冢皆京兆長安鎬聚東杜中又曰秦武王冢在安陵縣西北畢陌中大家是也人以為周文王冢者非也周文冢在杜中案杜中即杜縣之中也杜縣在鎬之東於唐長安縣為東南二十里此說而果不謬則畢又在渭南也予於是取此數說者而參求之長安有畢陌咸陽又有畢原則原之為地亘渭南北有



之故古記於畢皆著文武葬地者因畢名兩出而亦  
兩傳也此其誤之所起也若以人情言之文都豐武  
都鎬豐鎬與杜相屬則皇覽謂文王葬於渭南者其  
理順也文王既葬渭南則周公葬畢必附文墓矣劉  
向傳臣瓚引汲郡古文為據曰畢西於豐三十里則  
地為渭南甚明安陵有大家皇覽明指其為秦文王  
墓則渭北之文冢其不為周文而為秦文亦可據矣

安陵在  
咸陽

武王陵

汲冢周書武王崩鎬建于岐周葬于畢

皇覽文王武王冢皆在京兆長安鎬聚東杜中

隆平集文武二冢乾德四年給陵戶祠祭如太昊

成王陵

文獻通考葬京兆咸陽縣

康王陵

文獻通考葬京兆咸陽縣

隆平集成康二冢乾德四年詔給守陵三戶歲一享

昭王陵

明一統志在登封縣少室山陽城西谷

穆王陵

明一統志在西安府西南二十五里張恭村

厲王陵

明一統志在霍州東北王出奔邲而崩因葬焉

幽王陵

元和郡縣志周幽王陵在長安縣東北二十五里  
明一統志在臨潼縣東北二十五里

桓王陵

太平寰宇記葬河南澠池縣東北一百二十里

靈王陵

皇覽靈王冢在河南城西南柏亭西周山上蓋以王  
生而有髭而神故謚靈王其冢民祀之不絕  
水經注洛水故瀆東逕周山上有周靈王冢

景王 悼王 敬王陵

皇覽景王冢在洛陽太倉中秦封呂不韋洛陽十萬戶故大其城并圍景王冢也

寰宇記帝王紀云景王葬於翟泉今東陽門內有大街北有太倉中是景王陵西南望步廣里北眺翟泉二處相距遠近畧均之也

水經註洛水東北逕柏亭南又東北逕三王陵三王或言周景王悼王定王也子朝作難悼敬二王與景

王俱葬於此故世以三王名陵帝王世紀曰景王葬於翟泉今洛陽太倉中大冢是也而後傳言在此所未詳矣又悼敬二王稽諸史傳復無葬處今陵東有石碑錄赧王以上世王名號考之碑記周墓明矣

文獻通考景王葬河南洛陽縣太倉中

威烈王陵

文獻通考葬河南洛陽城中東北隅

隆平集桓靈景威烈四王墓乾德四年詔州縣常禁

樵採

赧王冢

明一統志在隴州西北三十里

秦始皇陵

史記始皇初即位穿治鄜山及并天下天下徒送詣七十餘萬人穿三泉下銅而致樽宮觀百官奇器珍怪徙藏滿之令匠作機弩矢有所穿近者輒射之以水銀為百川江河大海機相灌輸上具天文下具地

理以人魚膏為燭度不滅者久之二世曰先帝後宮  
非有子者出焉不宜皆令從死死者甚眾葬既已下  
或言工匠為機藏皆知之藏重即泄大事畢已藏閉  
中羨下外羨門盡閉工匠藏者無復出者樹草木以  
象山

賈山至言秦皇帝死葬乎驪山吏徒數十萬人曠日  
十年下徹三泉合采金石冶銅錮其內漆塗其外被  
以珠玉飾以翡翠中成觀游上成山林為葬殯之侈



至於此使其後世曾不得蓬顆蔽冢而託葬焉

漢舊儀驪山者古之驪國晉獻公伐之而取二女曰驪姬此山多黃金其南多美玉曰藍田故始皇貪而葬焉使丞相李斯將天下刑人徒隸七十二萬人作陵鑿以章程三十七歲錮水泉絕之塞以文石致以丹漆深極不可入奏之曰丞相臣斯昧死言臣所將徒隸七十二萬人治驪山者已深已極鑿之不入燒之不然叩之空空如下天狀制曰鑿之不入燒之不

然其旁行三十丈乃止

皇覽墳高五十餘丈周回五里餘

博物志始皇陵在驪山之北高數十丈周回六七里  
今在陰盤縣界北陵雖高大不足以銷六丈冰背陵  
障使東西流又此山運取大石於渭北堵故歌曰運  
石甘泉口渭水為不流千人唱萬人鉤金陵餘石大  
如彊

水經註秦始皇大興厚葬營建冢壙於麗戎之山一

名藍田其陰多金其陽多玉始皇貪其美名因而葬焉斬山鑿石下涸三泉以銅為椁旁行周回三餘里上畫天文星宿之象下以水銀為四瀆百川五岳九州具地理之勢宮觀百官奇器珍寶充滿其中令匠作機弩有所穿近輒射之以人魚膏為燭取其不滅者久之後宮無子者皆使殉葬甚衆墳高五丈周回五里餘作者七十萬人積年方成

元和郡縣志秦始皇陵在長安縣東八里始皇即位

治驪山陵役徒七十萬人今案其陵高大亦不足役七十萬人積年之功蓋以驪山水泉本北流者陂障使東西流又此土無石取大石於渭北諸山皆費功力由此也

雍錄關中記曰麗山之陵雖高大亦不足役七十萬人積年之功為其徙移水勢本北流者皆西北之又此土無石取大石於渭北諸山其費功由此甚也此說是矣而不究其實也驪山阿房兩役並興未論他

事且計八十里閭道其土木之費工力之大自應廣  
調而久役矣史記及賈山疏皆言阿房始皇所造獨  
黃圖言阿房一名阿城惠文已造而始皇廣之此恐  
不然也始皇明言朝廷小不足容衆故渡渭而南以  
營朝宮則其創意營造出於始皇不出前人也

魏了翁古今考高祖為亭長送徒驪山秦政自營墳  
墓也古之帝王未始有是劉向曰黃帝葬於橋山堯  
葬濟陰丘壘皆小葬具甚微舜葬蒼梧二妃不從禹

葬會稽不改其列文武周公葬於畢皆無丘壟之處  
雖然此僅言薄葬耳而經傳咸無帝王自營墳墓之  
文考之儀禮自始死小斂大斂殯奠後始記筮宅然  
則筮宅蓋生者之事也或曰事不預定而取辦於倉  
卒可乎曰古之葬與今異冢人掌公墓之地辨其兆  
域而為之圖先王之葬居中以昭穆為左右若文王  
葬於畢則子孫皆就而葬之文王居中武王為昭居  
左成王為穆居右則兆域之列固有序下至公卿

大夫皆以爵列為丘封之度雖萬民墓地亦墓大夫掌之蓋自天子以至庶人未有不族葬而序列者故兆域既有定序丘封亦有定制非如後世有某山某水之說則取辦於殯斂殷奠之後乃人情事理之當然闔閭秦惠文等五王始大作丘隴多其瘞藏至秦政自為驪山用吏徒數十萬人曠日十年上崇山墳下錮三泉其高五十餘丈周回五里餘石椁為游觀人膏為燈燭水銀為江海黃金為鳬雁被以珠玉飾

以翡翠中成游觀上成山陵慮人之窺伺也則為機械之變以射穿掘之人慮為機者之泄也則生墮工匠慮無與其樂也則多殺宮人實之曾未幾何外被項籍之灾內罹牧豎之禍然則徒役數十萬祇以自戮其尸焉耳由是而後襲為故常漢之陵與廟率是人主自為之

漢太上皇陵

漢書高祖十年秋七月癸卯太上皇崩葬萬年赦櫟



陽囚死罪以下

臣瓚曰萬年陵在櫟陽縣界故特赦之

漢舊儀太上皇萬年邑千戶徙天下民墳三百萬以

上與田宅守陵

三輔黃圖高帝葬太上皇於櫟陽北原因置萬年縣於櫟陽大城內以為奉陵邑其陵在東者太上皇西昭靈后也

雍錄漢太上皇陵在櫟陽縣東北二十五里

元和志同

高祖長陵

漢書十二年夏四月甲辰帝崩于長樂宮丁未發喪

五月丙寅葬長陵

臣瓚曰自崩至葬凡二十三日陵在長安北四十里

漢舊儀漢興立都長安徙齊田楚昭屈景及諸功臣家於長陵後世世徙吏二千石高貲富人及豪傑無併之家於諸陵長陵邑萬戶奉常屬官有諸廟寢園令長丞東園近令丞主作陵內器物又有園郎寢郎故事近臣皆隨陵為園郎園中各有寢便殿日祭於寢月祭於廟時祭於便殿寢日四上食丞相以四時

行園

三輔黃圖高祖長陵在渭水北去長安城三十五里  
案高祖本紀十二年四月甲辰崩于長樂宮五月葬  
長陵長陵山東西各一百二十步高十三丈長陵城  
周七里百八十步因為殿垣門四出及便殿掖庭諸  
官寺皆在中

呂后陵在高祖陵東案史記外戚世家高后合葬長  
陵註云漢帝后同塋則為合葬不合陵也

水經註故渠又東逕長陵南亦曰長山也

元和郡縣志漢長陵在咸陽縣東三十里高帝陵也

三輔黃圖文帝母薄姬南陵在霸陵南故曰南陵

今即

所謂薄陵也

雍錄薄后不祔高帝陵而葬於文帝陵東南二十里亦仍霸陵之名故加南以別之是為南霸陵也

惠帝安陵

漢書七年秋八月戊寅帝崩於未央宮九月辛丑葬

安陵

臣瓚曰自崩至葬凡二十有四日

三輔黃圖安陵去長陵十里在長安城北三十五里有果園鹿苑

水經註故渠又逕惠帝安陵南陵北有安陵縣故城元和郡縣志安陵漢惠帝陵也在咸陽東北二十里漢外戚傳孝惠張皇后孝文後元年夢葬安陵不起墳

文帝霸陵

漢書本紀後七年夏六月己亥帝崩于未央宮遺詔

霸陵山川因其故無有所改

應劭曰因山為藏不復起墳山下川流不遏絕

就其水名為陵號

令中尉亞夫為車騎將軍屬國悍為將屯

將軍郎中令張武為復土將軍

師古曰穿壙出土下棺也已而寘之即以下

為墳故云復土

發近縣卒萬六千人發內史卒萬五千人藏

郭穿復土屬將軍武乙巳葬霸陵

師古曰自崩至葬凡七日也

張釋之傳釋之為中郎將從行至霸陵上居外臨廁

時慎夫人從上指視慎夫人新豐道曰此走邯鄲道

也使慎夫人鼓瑟上自倚瑟而歌意悽愴悲懷顧謂  
羣臣曰嗟乎以北山石為椁用紵絮斲陳漆其間豈  
可動哉左右皆曰善釋之前曰使其中有可欲雖錮  
南山猶有隙使其中亡可欲雖亡石椁又何戚焉文  
帝善

三輔黃圖霸陵在長安城東七十里

水經註霸水左合漣水歷白鹿原東是謂之霸上漢  
文帝葬其上謂之霸陵上有四出道以瀉水在長安

東南三十里故王仲宣賦詩云南登霸陵岸回首望  
長安是也

元和郡縣志白鹿原在萬年縣東二十里亦謂之霸  
上漢文帝葬焉

雍錄文帝嘗欲馳車下霸西峻坂因袁盎諫而止即  
白鹿原之西坡也帝樂其地遂即霸上立陵以為霸  
陵陵後又置縣是為霸陵縣也

野客叢談漢文帝遺詔霸陵山川因其故無有所改



示從儉也班固贊帝治霸陵皆瓦器不得以金銀銅  
錫為飾因其山不起墳劉向亦曰文帝去墳薄葬以  
儉安神可謂知矣觀晉索琳傳

見後杜陵

不能無疑武帝

多藏金錢財物已見於貢禹所陳宣帝不得而知然  
以貢禹杜陵宮人數百之言推之恐亦未免惟文帝  
平生節儉人無間言臨終遺至薄之制徵至銅錫不  
以為飾炳然載於史冊以薄送終考晉愍帝紀建興  
二年盜發霸杜陵及薄太后陵金玉綵帛不可勝計

敕收其餘以實內庫可驗畜積之多也是文帝之陵  
果不免矣然而沈炯賦曰咄嗟驪山之阜惆悵霸陵  
之原文若儉而無隙羸發掘其何言鮑溶詩曰儉風  
本自張廷尉霸陵一代無毀發白居易詩亦曰驪山  
脚下秦皇墓一朝盜掘墳陵破可憐寶玉歸人間暫  
借泉中買身禍奢者狼狽儉者存一凶一吉在眼前  
憑君回首向南望漢文高葬霸陵原如炯白等所言  
則霸陵初未嘗發也不知前說何紛紛如此

乾學案沈鮑諸詠謂霸陵初未嘗發不過以  
魏文帝終制有霸陵之完功在釋之一語耳  
其實至晉始發詞人不核實如此

漢外戚傳孝文竇皇后建元六年崩合葬霸陵

### 景帝陽陵

漢書五年春正月作陽陵邑

張晏曰帝作  
壽陵起邑

夏募民徙

陽陵後三年春正月甲子帝崩于未央宮二月癸酉

葬陽陵

臣瓚曰自崩  
及葬凡十日

三輔黃圖陽陵在長安城東北四十五里山方百二十步高十丈

元和郡縣志陽陵景帝陵也在咸陽縣東四十里

漢舊儀安陵霸陵陽陵邑各萬戶徙民與長陵等

漢外戚傳孝景薄皇后立六年廢廢後四年薨葬長

安城東平望亭南王皇后元朔元年崩合葬陽陵

武帝茂陵

漢書建元二年夏四月初置茂陵邑

師古曰本槐里縣之茂鄉故曰

茂陵後元二年二月丁卯帝崩于五柞宮入殯于未央

宮前殿三月甲申葬茂陵

臣瓚曰自崩至葬凡十八日

漢舊儀每天子即位明年將作大匠營陵地用地七頃方中用地一頃深十三丈堂壇高三丈墳高十二丈武帝墳高二十丈明中高一丈七尺四周二丈內梓棺柏黃腸題湊以次百官藏畢其設四通羨門容大車六馬皆藏之內方外陟車右外方立先閑劍戶戶設夜龍莫邪劍伏弩設伏火以營陵餘地為四園

后陵餘地為健仔以下次賜親屬功臣

三輔黃圖茂陵在長安城西北八十里周圍三里三  
輔舊事云武帝於槐里茂鄉徙戶一萬六千

一作六萬二千

置茂陵高一十四丈一百步茂陵園有鶴觀

乾學案鶴觀孝元紀作白鶴館

水經註茂陵故槐里之茂鄉也應劭曰武帝自為陵  
在長安西北八十餘里

元和郡縣志茂陵在興平縣東北十七里武帝陵也

守陵溉樹埽除凡五千人

文獻通考漢法天子即位一年而為陵天下貢賦三分之一供宗廟一供賓客一供山陵武帝歷年久長比崩陵中至不復容物由霍光闇於大體奢侈過度也

漢書衛皇后遭巫蠱事起收璽綬自殺盛以小棺瘞之城南桐柏宣帝立乃改葬追謚曰思后置園邑三百家長丞周衛奉守焉

師古曰葬在杜門外大道東以倡優雜伎千人樂其園故

號千人聚其地在今長安城內金城坊西北隅

李夫人蚤卒上憐閔焉圖畫

其形於甘泉宮及衛思后廢後四年武帝崩大將軍霍光緣上雅意以李夫人配食追上尊號曰孝武皇后

三輔黃圖李夫人墓東西五十步南北六十步高八丈在茂陵西北一里俗名英陵亦云集仙臺

一曰高三十丈

周回六百六十步

漢書鉤弋趙婕妤昭帝母也從幸甘泉有過見譴以



憂死因葬雲陽

師古曰在甘泉宮南  
今土人瘞為女陵

昭帝即位追尊

為皇太后發卒二萬人起雲陵邑三千戶

## 昭帝平陵

漢書元平元年夏四月癸未帝崩于未央宮六月壬

申葬于平陵

臣瓚曰自崩至  
葬凡四十九日

三輔黃圖平陵在長安西北七十里去茂陵十里帝  
初作壽陵令流水而已石槨一丈二尺長二丈五尺  
無得起墳陵東北作廡長三丈五步外為小厨裁足

祠祝萬年之後埽地而祭

雍錄昭帝平陵在咸陽西北二十里

漢書上官皇后建昭二年崩合葬平陵

宣帝杜陵

漢書黃龍元年十二月甲戌帝崩于未央宮元帝初

元元年春正月辛丑葬杜陵

臣瓚曰自崩至葬凡一十八日

漢舊儀茂陵平陵杜陵邑皆取二千石將相守陵故

三陵多貴皆三萬戶至五萬戶

貢禹傳元帝初貢禹奏言武帝多取好女至數千人以填後宮及棄天下昭帝幼弱霍光專事不知禮正妄多臧金錢財物鳥獸魚鼈牛馬虎豹生禽凡百九十物盡瘞臧之又皆以後宮女置於園陵大失禮逆天心又未必稱武帝意也昭帝晏駕光復行之至孝宣皇帝時羣臣亦隨故事使天下承化衆庶葬埋皆虛地上以實地下其過自上生皆在大臣循故事之臯也惟陛下深察古道從其儉者諸陵園女亡子

者宜悉遣天子納善其忠

三輔黃圖杜陵在長城南帝在民間時好游鄠杜間  
故葬此

水經註元帝初元元年葬宣帝杜陵北去長安五十  
里

元和郡縣志杜陵在萬年縣東南二十里漢宣帝陵  
也

雍錄宣帝杜陵在長安東南二十里

晉書愍帝時三秦入尹桓解武等數千家盜發漢霸  
杜二陵多獲珍寶帝問驃騎大將軍索綝曰漢陵中  
物何乃多邪綝對曰漢天子即位一年而為陵天下  
貢賦三分之一供宗廟一供賓客一充山陵漢武帝  
享年久長比崩而茂陵不復容物其樹皆已可拱赤  
眉取陵中物不能減半於今猶有朽帛委積珠玉未  
盡此二陵是儉者耳亦百世之誠也

漢書許皇后元帝母也立三年而崩謚曰恭哀皇后

葬杜南是謂杜陵南園

師古曰即今所謂小陵者去杜陵十八里

霍皇

后大司馬大將軍博陸侯光女也立五年廢處昭臺

宮後十二歲徙雲林館迺自殺葬昆吾亭東

師古曰在藍田

霍皇后廢立王婕妤為皇后立十六年宣帝崩元

帝即位為皇太后成帝即位為太皇太后成帝母亦

姓王氏故世號太皇太后為邛成太后永始元年崩

合葬杜陵稱東園

師古曰雖同塋兆而別為墳王后陵次宣帝陵東故曰東園也

元帝渭陵

漢書永光四年冬十月乙丑諸陵分屬三輔以渭城

壽陵亭部原上為初陵

服虔曰元帝所置陵也  
未有名故曰初

詔曰安

土重遷黎民之性骨肉相附人情所願也頃者有司  
緣臣子之義奏徙郡國民以奉園陵令百姓遠棄先  
祖墳墓破業失產親戚別離人懷思慕之心家有不  
安之意是以東垂被虛耗之害關中有無聊之民非  
久長之策也詩不云乎民亦勞止迄可小康惠此中  
國以綏四方今所為初陵者勿置縣邑使天下咸安

土樂業亡有動搖之心布告天下命明知之竟寧元

年五月壬辰帝崩于未央宮秋七月丙戌葬渭陵

臣璣

曰自崩及葬  
凡五十五日

皇覽漢家之葬方中百步已穿築為方城其中開四  
門四通足放六馬然後錯運雜物扞漆繒綺金寶米  
穀及埋車馬虎豹禽獸發近郡卒徒置將軍尉候以  
後宮貴幸者皆守園陵元帝葬乃不用車馬禽獸等  
物



乾學案漢之諸陵皆徙民置邑勞苦萬姓至  
元帝始惻然罷之後遂以為永制亦可謂仁  
人之用心矣

三輔黃圖渭陵在長安北五十六里

水經註故渠又東逕渭陵元帝永光四年以渭城壽  
陵亭原上為初陵詔不立縣邑元壽元年傅后崩合  
葬渭陵潘岳關中記漢帝后同陵則為合葬不共陵  
也渭陵非謂元帝陵也蓋在渭水之南故曰渭陵

元和郡縣志渭陵元帝陵也在咸陽縣西北七里

漢書孝元皇后王莽之姑也建國五年二月癸丑崩  
三月乙酉合葬渭陵 傳昭儀哀帝祖母也元壽元  
年崩合葬渭陵稱孝元傳皇后云

成帝延陵

漢書本紀永始元年秋七月詔曰朕執德不固謀不  
盡下過聽將作大匠萬年言昌陵三年可成作治五  
年中陵司馬殿門內尚未加功天下虛耗百姓罷勞

客土疏惡終不可成朕惟其難怛然傷心夫過而不改是謂過矣其罷昌陵及故陵勿徙吏民令天下毋有動搖之心

陳湯傳初湯與將作大匠解萬年相善自元帝時渭陵不復徙民起邑成帝起初陵數年後樂霸陵曲亭南更營之萬年與湯議以為武帝時工楊光以所作數可意自致將作大匠及大司農中丞耿壽昌造杜陵賜爵關內侯將作大匠乘馬延年以勞苦秩中二

千石今作初陵而營起邑居成大功萬年亦當蒙重

賞子公妻家在長安

湯字子公

兒子生長長安不樂東方

宜求徙可得賜田宅俱善湯心利之即上封事言初陵京師之地最為肥美可立一縣天下民不徙諸陵三十餘歲矣關東富人益衆多規良田役使貧民可徙初陵以強京師衰弱諸侯又使中家以下得均貧富湯願與妻子家屬徙初陵為天下先於是天子從其計果起昌陵邑後徙內郡國民萬年自詭二年可

成後卒不就羣臣多言其不便者下有司議皆曰昌陵因卑為高積土為山度便房猶在平地上容土之中不保幽冥之靈淺外不固卒徒工庸以鉅萬數至難脂火夜作取土東山且與穀同賈作治數年天下徧被其勞國家罷敞府臧空虛下至衆庶熬熬苦之故陵因天性據真土處勢高敞旁近祖考前又已有十年功緒宜還復故陵勿徙民上迺下詔罷昌陵漢書本紀二年十二月詔曰前將作大匠萬年知昌

陵卑下不可為萬歲居奏請營作建置郭邑妄為巧  
詐積土增高多賦斂絲役興卒暴之作卒徒蒙辜死  
者連屬百姓罷極天下匱竭常侍閹前為大司農中  
丞數奏昌陵不可成侍中衛尉長數白宜蚤止徙家  
反故處朕以長言下閹章公卿議者皆合長計首建  
至策閹典主省大費民以康寧閹前賜爵關內侯黃  
金百斤其賜長爵關內侯食邑千戶閹五百戶萬年  
佞邪不忠毒流衆庶海內怨望至今不息雖蒙赦令

不宜居京師其徙萬年敦煌郡

劉向傳營起昌陵數年不成復還歸延陵制度泰奢  
向上疏諫曰臣聞易曰安不忘危存不忘亡是以身  
安而國家可保也故賢聖之君博觀終始窮極事情  
而是非分明王者必通三統明天命所授者博非獨  
一姓也孔子論詩至於殷士膚敏裸將于京喟然歎  
曰大哉天命善不可不傳於子孫是以富貴無常不  
如是則王公其何以戒慎民氓何以勸勉蓋傷微子

之事周而痛殷之亡也雖有堯舜之聖不能化丹朱  
之子雖有禹湯之德不能訓桀紂自古及今  
未有不亡之國也昔高皇帝既滅秦將都雒陽感寤  
劉敬之言自以德不及周而賢於秦遂徙都關中依  
周之德因秦之阻世之長短以德為效故常戰栗不  
敢諱亡孔子所謂富貴無常蓋謂此也孝文皇帝居  
霸陵北臨廁意悽愴悲懷顧謂羣臣曰嗟乎以北山  
石為樽用紵絮斲陳漆其間豈可動哉張釋之進曰



使其中有可欲雖錮南山猶有隙使其中無可欲雖  
無石槨又何憾焉夫死者無終極而國家有廢興故  
釋之之言為無窮計也孝文寤焉遂薄葬不起山墳  
易曰古之葬者厚衣之以薪藏之中野不封不樹後  
世聖人易之以棺槨棺槨之作自黃帝始黃帝葬于  
橋山堯葬濟陰丘隴皆小葬具甚微舜葬蒼梧二妃  
不從禹葬會稽不改其列殷湯無葬處文武周公葬  
于畢秦穆公葬于雍橐泉宮祈年館下櫟里子葬于

武庫皆無丘隴之處此聖帝明王賢君智士遠覽獨  
慮無窮之計也其賢臣孝子亦承命順意而薄葬之  
此誠奉安君父忠孝之至也夫周公武王弟也葬兄  
甚微孔子葬母子防稱古墓而不墳曰丘東西南北  
之人也不可不識也為四尺墳遇雨而崩弟子修之  
以告孔子孔子流涕曰吾聞之古者不修墓蓋非之  
也延陵季子適齊而反其子死葬於贏博之間穿不  
及泉斂以時服封墳掩坎其高可隱而號曰骨肉歸

復於土命也魂氣則無不之也夫嬴博去吳十有餘里季子不歸葬孔子往觀曰延陵季子於禮合矣故仲尼孝子而延陵慈父舜禹忠臣周公弟弟其葬君親骨肉皆微薄矣非苟為儉誠便於禮也宋桓司馬為石椁仲尼曰不如速朽秦相呂不韋集知畧之士而造春秋亦言薄葬之義皆明於事情者也逮至吳王闔閭違禮厚葬十有餘年越人發之及秦惠文武昭嚴襄五王皆大作丘隴多其瘞藏咸盡發掘暴露

甚足悲也秦始皇帝葬于驪山之阿下錮三泉上崇  
山墳其高五十餘丈周回五里有餘石槨為游館人膏  
為燈燭水銀為江海黃金為鳬雁珍寶之藏機械之  
變棺槨之麗宮館之盛不可勝原又多殺宮人生薶  
工匠計以萬數天下苦其役而反之驪山之作未成  
而周章百萬之師至其下矣項籍燔其宮室營宇往  
者咸見發掘其後牧兒亡羊羊入其鑿牧者持火照  
求羊失火燒其臧槨自古至今葬未有盛如始皇者

也數年之間外被項籍之災內離牧豎之禍豈不衰哉是故德彌厚者葬彌薄知愈深者葬愈微無德寡知其葬愈厚丘隴彌高宮廟甚麗發掘必速由是觀之明暗之效葬之吉凶昭然可見矣周德既衰而奢侈宣王賢而中興更爲儉宮室小寢廟詩人美之斯千之詩是也上章道宮室之如制下章言子孫之衆多也及魯嚴公刻飾宗廟多築臺囿後嗣再絕春秋刺焉周宣如彼而昌魯秦如此而絕是則奢儉之得

失也陛下即位躬親節儉始營初陵其制約小天下  
莫不稱賢明及徙昌陵增埤為高積土為山發民墳  
墓積以萬數營起邑居期日迫卒功費大萬百餘死  
者恨於下生者愁於上怨氣感動陰陽因之以饑饉  
物故流離以十萬數臣甚懼焉以死者為有知發人  
之墓其害多矣若其無知又安用大謀之賢知則不  
說以示衆庶則苦之若苟以說愚夫淫侈之人又何  
為哉陛下仁慈篤美甚厚聰明疏達蓋世宜弘漢家

之德崇劉氏之美光昭五帝三王而顧與暴秦亂君  
競為奢侈比方丘隴說愚夫之目隆一時之觀違賢  
知之心亡萬世之安臣竊為陛下羞之唯陛下上覽  
明聖黃帝堯舜禹湯文武周公仲尼之制下觀賢知  
穆公延陵樗里張釋之之意孝文皇帝去墳薄葬以  
儉安神可以為則秦昭始皇增山厚臧以侈生害足  
以為戒初陵之撫宜從公卿大臣之議以息眾庶書  
奏上甚感向言而不能從其計

漢書本紀綏和二年三月丙戌帝崩于未央宮四月

己卯葬延陵

臣瓚曰自崩至葬凡五十四日

三輔黃圖延陵在扶風去長安六十二里

一曰武帝於霸陵北

步昌亭起壽陵即武帝之廢陵也

水經註故渠東逕成帝延陵南

元和郡縣志延陵成帝陵也在咸陽縣西北十三里

漢書孝成許皇后立十四年而廢在昭臺歲餘還徙

長定宮賜藥自殺葬延陵交道廢西

班婕妤成帝



崩充奉園陵薨因葬園中

哀帝義陵

漢書建平二年七月以渭城西北原上永陵亭部為

初陵勿徙郡國民使得自安元壽二年六月戊午帝

崩于未央宮秋九月壬寅葬義陵

臣瓚曰自崩至葬凡百五日

平帝元始元年詔義陵民冢不妨殿中者勿發

師古曰殿

中謂壙中  
象正殿處

三輔黃圖哀帝義陵在扶風渭城西北原上去長安

四十六里

水經注故渠又東逕哀帝義陵南

元和郡縣志義陵哀帝陵也在咸陽縣西北八里

平帝康陵

漢書元始五年冬十二月丙午帝崩于未央宮葬康陵

三輔黃圖康陵在長安北六十里興平原口

水經注延陵之東北五里即平帝之康陵阪也

元和郡縣志康陵平帝陵也在咸陽縣西北九里  
西京雜記漢諸陵寢殿皆以竹為簾皆為水紋及龍  
鳳之像

讀禮通考卷八十八

欽定四庫全書

讀禮通考卷八十九

刑部尚書徐乾學撰

葬考七

山陵二

東漢章陵

後漢書城陽恭王傳建武二年以皇祖皇考墓為昌陵置陵令守視後改為章陵因以舂陵為章陵縣蔡邕獨斷世祖父南頓令曰皇考祖鉅鹿都尉曰皇

祖

世祖原陵

後漢書本紀建武二十六年春正月初作壽陵

注初作陵

未有名故號壽陵  
蓋取久長之義

將作大匠竇融上言園陵廣袤無

慮所用帝曰古者帝王之葬皆陶人瓦器木車茅馬  
使後世之人不知其處太宗識終始之義景帝能述  
遵孝道遭天下反覆而霸陵獨完受其福豈不美哉  
今所制地不過二三頃無為山陵陂池裁令流水而

已中元二年二月帝崩于南宮前殿三月丁卯葬原陵

帝王世紀原陵方三百二十步高六丈在臨平亭東南去洛陽十五里

文獻通考山方三百二十三步高六丈六尺垣四出司馬門寢殿鍾虡皆在周垣內提封田十二頃五十畝八十五步

後漢書光烈陰皇后崩合葬原陵

明帝顯節陵

後漢書永平十八年秋八月壬子帝崩于東宮前殿  
遺詔無起寢廟初作壽陵制令流水而已石槨廣一  
丈二尺長二丈五尺無得起墳萬年之後埽地而祭  
杆水脯糒而已過百日唯四時設奠置吏卒數人供  
給灑埽勿開脩道敢有所興作者以擅議宗廟法從

事

注擅議宗廟者棄市

壬戌葬顯節陵

東觀漢紀陵東北作廡長三丈五步外為小厨財足



祠祀

帝王世紀顯節陵方三百步高八丈其地故富壽亭也西北去洛陽三十七里

文獻通考山方三百步高八尺無周垣為行馬四出在殿北提封田七十四頃五畝

東平王傳帝

章帝也

欲為原陵顯節陵起縣邑蒼聞之

遽上疏諫曰伏聞當為二陵起立郭邑竊見光武皇帝躬履儉約之行深覩始終之分勤勤懇懇以葬制

為言故營建陵地具稱古典詔曰無為山陵陂池裁  
令流水而已孝明皇帝大孝無違奉承貫行至於自  
所營創尤為儉省謙德之美於斯為盛臣愚以園邑  
之興始自彊秦古者丘隴且不欲其著明豈況築郭  
邑建都郭哉上違先帝聖心下造無益之功虛費國  
用動搖百姓非所以致和氣祈豐年也又以吉凶俗  
數言之亦不欲無故繕修丘墓有所興起考之古法  
則不合稽之時宜則違人求之吉凶復未見其福陛

下履有虞之至性追祖禰之深思然懼左右過議以累聖心臣蒼誠傷二帝純德之美不暢於無窮也帝從而止

後漢皇后紀明德馬皇后崩合葬顯節陵

### 章帝敬陵

後漢書章和二年春正月壬辰帝崩于章德前殿遺詔無起寢廟一如先帝法制三月癸卯葬敬陵

帝王世紀在洛陽城東南去洛陽三十九里

伏侯古今注陵周三百里高六丈二尺

文獻通考山方三百步高六丈二尺無周垣為行馬  
四出司馬門石殿鍾虞在行馬內寢殿園省在東園  
寺吏舍在殿北提封田二十五頃五十五畝

後漢皇后紀章德竇皇后合葬敬陵

獨斷章帝宋貴人曰敬隱后葬北陵安帝祖母也梁  
貴人曰恭懷后葬西陵和帝母也

和帝慎陵

後漢書元興元年冬十二月辛未帝崩于章德前殿  
殤帝延平元年三月甲申葬慎陵

帝王世紀在洛陽東南三十里

文獻通考山方三百八十步高十丈無周垣為行馬  
四出司馬門石殿鐘虡在行馬內寢殿園省在東園  
寺吏舍在殿北提封田三十一頃二十畝二百步

後漢皇后紀陰皇后葬臨平亭部 和熹鄧皇后合

葬順陵

章懷太子注帝紀慎陵俗本作順者悞

乾學案解犢侯萇生靈帝其陵曰慎陵不應  
與和帝複出疑鄧皇后紀作順陵者非誤也

殤帝康陵

後漢書延平元年八月辛亥帝崩癸丑殯于崇德前

殿九月丙寅葬康陵

注陵在慎陵  
塋中庚地

帝王世紀高五丈四尺去洛陽四十八里

文獻通考山周二百八步高五丈五尺行馬四出司  
馬門寢殿鍾虡在行馬中因寢殿為廟園吏寺舍在

殿北提封田十三頃十九畝二百五十步

獨斷以陵寢為廟者三殤帝康陵沖帝懷陵質帝靜陵是也  
安帝恭陵

後漢書延光四年三月丁卯章帝崩于乘輿庚午

還宮辛未夕乃發喪夏四月己酉葬恭陵

注在今洛陽東北二十七里

伏侯古今注陵山周二百六十丈高十五丈

帝王世紀高十一丈在洛陽西北去洛陽十五里

文獻通考山周二百六十步高十五丈無周垣為行

馬四出司馬門石殿鍾虞在行馬內寢殿園吏寺舍  
在殿北提封田一十四頃五十六畝

後漢皇后紀安思閭皇后合葬恭陵 順帝母李氏

瘞在洛陽城北帝初不知及太后崩左右白之帝感  
悟發哀親到瘞所更以禮殯上尊諡曰恭愍皇后葬

恭北陵

注在恭陵之北漢官儀曰制陵園令食監各一人秩皆六百石

獨斷安帝李貴人曰恭敏后葬北陵順帝母也

順帝憲陵



後漢書建康元年八月帝崩于玉堂前殿遺詔無起  
寢廟九月丙午葬憲陵

帝王世紀在洛陽西北去洛陽十五里

文獻通考山方三百步高八丈四尺無周垣為行馬  
四出司馬門石殿鍾虞在司馬門內寢殿園省寺吏  
舍在殿東提封田十八頃十九畝三十步

後漢皇后紀順烈梁皇后合葬憲陵

沖帝懷陵

後漢書永嘉元年春正月戊戌帝崩于玉堂前殿己未葬懷陵  
帝王世紀西北去洛陽十五里

伏侯古今注高四丈六尺周百八十三步

文獻通考山方百八十三步高四丈六尺為寢殿行  
馬四出門園寺更舍在殿東提封田五頃八十畝

李固傳沖帝崩將北卜山陵固乃議曰今處處寇賊軍  
興用費加倍新創憲陵賦發非一帝尚幼小可起陵於  
憲陵塋內依康陵制度其於役費三分減一乃從固議

質帝靜陵

後漢書本初元年閏月

閏六月也

甲申大將軍梁冀潛行鴆

弑帝崩于玉堂前殿秋七月乙卯葬靜陵

注在洛陽東南三十里

帝王世紀在洛陽東去洛陽三十二里

文獻通考山方百三十八步高五丈五尺為行馬四

出門寢殿鍾虞在行馬中園寺吏舍在殿北提封田

十二頃五十四畝因寢為廟

桓帝宣陵

後漢書永康元年十二月丁丑帝崩于德陽前殿靈  
帝建寧元年二月辛酉葬宣陵

帝王世紀山方二百步高十二丈在洛陽東南去洛陽三十里  
後漢皇后紀懿獻梁皇后延熹二年葬懿陵其歲誅梁冀廢  
懿陵為貴人冢 鄧皇后葬北邙 桓思竇皇后合葬宣陵  
靈帝文陵

後漢書中平六年夏四月丙辰帝崩于南宮嘉德殿  
六月辛酉葬文陵

帝王世紀山方三百步高十二丈在洛陽西北去洛陽三十里  
太平寰宇記靈帝陵在河清縣東南三十里

後漢書皇后紀宋皇后光和元年以憂死諸常侍憐  
后無辜共合錢物收葬歸宋氏舊塋皋門亭 靈思  
何皇后合葬文昭陵 王美人生皇子協興平元年  
追尊為靈懷皇后改葬文昭陵

獻帝禪陵

後漢書帝遜位魏王丕稱天子奉帝為山陽公魏青

龍二年薨八月壬申以漢天子禮儀葬于禪陵置園  
邑令丞

獻帝傳明帝命司徒司空持節弔祭護喪光祿大鴻  
臚為副將作大匠復土將軍營成陵墓及置百官羣  
吏車旂服章喪葬禮儀一如漢氏故事

帝王世紀禪陵在濁鹿城西北十里在今懷州修武  
縣北二十五里陵高二丈周回二百步

劉澄之地記以漢禪魏故以名焉

後漢皇后紀獻穆曹皇后魏公操之中女也景初元年薨合葬禪陵

先主惠陵

蜀志章武三年夏四月癸巳先主殂于永安宮五月

梓宮自永安還成都秋八月葬惠陵

華陽國志同

甘皇

后卒葬南郡追謚皇思夫人遷葬于蜀未至而先主

殂丞相亮案謚法宜曰昭烈皇后與大行皇帝合葬

制曰可

與太常丞  
賴恭等議

穆皇后延熙八年薨合葬惠陵

後主

蜀志後主以太始七年薨于洛陽 敬哀皇后車騎

將軍張飛長女也葬南陵

附

戾園 悼園

漢書衛皇后生戾太子納史良娣巫蠱事起太子之

亡也東至湖臧匿泉鳩里 師古曰湖縣名今號州湖城二縣皆其地也 太

子有故人在湖使人呼之而發覺吏圍捕太子太子

自經後憐太子無辜乃作思子宮為歸來望思之臺



於湖史良娣葬長安城南史皇孫皇孫妃王夫人葬  
廣明皇孫二人隨太子者與太子并葬湖宣帝即位  
詔曰故皇太子在湖未有號謚歲時祠其議謚置園  
邑有司奏故皇太子起位在湖史良娣冢在博望苑  
北親史皇孫位在廣明郭北  
文穎曰位冢位也  
如淳曰親謂父也親謚  
宜曰悼皇母曰悼后比諸侯王園置奉邑三百家故  
皇太子謚曰戾置奉邑二百家史良娣曰戾夫人置  
守冢三十家園置長丞周衛奉守如法以湖閭鄉邪

里聚為戾園長安白亭東為戾后園廣明成鄉為悼  
園皆改葬焉後八歲有司復言禮父為士子為天子  
祭以天子悼園宜稱尊號曰皇考立廟因園為寢以  
時薦享焉益奉園民滿千六百家以為奉明縣尊戾  
夫人曰戾后置園奉邑及益戾園各滿三百家

師古  
曰泉

鳩水今在閬鄉縣東南十五里  
見有戾太子冢冢在澗東也

太平寰宇記閬鄉縣本漢湖縣戾園之地太子園陵  
存焉在縣南一十六里高一百五十尺

恭皇園

漢書建平二年六月帝太后丁氏崩上曰朕聞夫婦一體詩曰穀則異室死則同穴附葬之禮自周興焉郁郁乎文哉吾從周孝子事亡如事存帝太后宜起陵恭皇之園遂葬定陶發陳留濟陰近郡國五萬人穿復土

水經注濟水又東北逕定陶恭王陵南漢哀帝父也帝即位母丁太后崩上曰宜起陵恭皇之園遂葬定

陶王莽秉政貶號丁姬聞其槲戶火出炎四五丈吏卒以水沃滅乃得入燒燔樽中器物掘平共王母傳太后墳及丁姬冢周棘其處時有羣燕數千銜土投於丁姬窀中今其墳冢巍然尚秀隅阿相承列郭數周面開重門南門內夾道有崩碑二所世尚謂之丁昭儀墓又謂之長隧陵蓋所毀者傳太后陵耳瀆南魏郡治也世謂之左城亦名之曰葬城蓋恭王之陵寢也

# 甘陵

水經注漢安帝父孝德皇以太子被廢為王薨於此  
乃葬其地尊陵曰甘陵桓帝建和元年改曰甘陵縣  
是周之甘泉匝地也陵在瀆北丘墳高巨雖中經發  
壞猶若層陵矣

後漢書永初元年有司上言清河孝王至德淳懿載  
育明聖承天奉祚為郊廟主漢興高皇帝尊父為太  
上皇宣帝號父為皇考序昭穆置園邑太宗之義舊

章不忘宜上尊號曰孝德皇皇妣左氏曰孝德后尊陵曰甘陵廟曰昭廟置令丞設兵車周衛比章陵

樂成陵 博陵

後漢書孝桓皇帝祖父河間孝王開父螽吾侯翼本

初元年九月追尊皇祖曰孝穆皇夫人趙氏曰孝穆

皇后考曰孝崇皇冬十月尊皇母區氏為孝崇博園

貴人

注博本漢螽吾縣之地帝既追尊父為孝崇皇其陵曰博陵置園廟焉故曰博園在今瀛州博

縣野

和平元年夏五月尊博園園貴人曰孝崇皇后元嘉  
二年夏四月甲寅孝崇皇后園氏崩五月辛卯葬孝  
崇皇后于博陵延熹元年夏六月分中山置博陵郡  
以奉孝崇皇園陵

孝穆皇廟曰清廟陵曰樂成陵孝崇皇廟曰烈廟陵  
曰博陵皆置令丞

敦陵 慎陵

後漢書解瀆亭侯淑以河間孝王子封淑卒子長嗣

長卒子宏嗣為大將軍竇武所立是為靈帝建寧元年追尊皇祖淑為孝元皇夫人夏氏曰孝元后陵曰敦陵廟曰靖廟皇考長為孝仁皇夫人董氏為慎園貴人陵曰慎陵廟曰貞廟皆置令丞

魏武帝高陵

魏志建安二十三年六月令曰古之葬者必居瘠薄之地其規西門豹祠西原上為壽陵因高為基不封不樹周禮冢人掌公墓之地凡諸侯居左右以前卿



大夫居後漢制亦謂之陪陵其公卿大臣列將有功者宜陪壽陵其廣為兆域使足相容二十五年春正月庚子王崩于洛陽遺令斂以時服無藏金玉珍寶二月丁卯葬高陵

元和郡縣志魏武帝西陵在鄴縣西三十里魏后妃傳武宣卞皇后文帝母也太和四年崩七月合葬高陵

文帝首陽陵

魏志黃初三年冬十月甲子表首陽山東為壽陵作  
終制曰禮國君即位為禋存不忘亡也昔堯葬穀林  
通樹之禹葬會稽農不易畝故葬於山林則合乎山  
林封樹之制非上古也吾無取焉壽陵因山為體無  
為封樹無立寢殿造園邑通神道夫葬也者藏也欲  
人之不得見也骨無痛痒之知冢非棲神之宅禮不  
墓祭欲存亡之不黷也為棺槨足以朽骨衣衾足以  
朽肉而已故吾營此丘墟不食之地欲使易代之後

不知其處無施葦炭無藏金銀銅鐵一以瓦器合古  
塗車芻靈之義棺但漆際會三過飯含無以珠玉無  
施珠襦玉匣諸愚俗所為也季孫以璵璠斂孔子歷  
級而救之譬之暴骸中原宋公厚葬君子謂華元樂  
莒不臣以為棄君於惡漢文帝之不發霸陵無求也  
光武之掘原陵封樹也霸陵之完功在釋之原陵之  
掘罪在明帝是釋之忠以利君明帝愛以害親也忠  
臣孝子宜思仲尼丘明釋之之言鑒華元樂莒明帝

之戒存於所以安君定親使魂靈萬載無危斯則賢  
聖之忠孝矣自古及今未有不亡之國亦無不掘之  
墓也喪亂以來漢氏諸陵無不發掘至乃燒取玉匣  
金縷骸骨并盡是焚如之刑也豈不重痛哉禍由乎  
厚葬封樹桑霍為我戒不亦明乎其皇后及貴人以  
下不隨王之國者有終沒皆葬澗西前又以表其處  
矣蓋舜葬蒼梧二妃不從延陵葬子遠在羸博魂而  
有靈無不之也一澗之間不足為遠若違今詔妄有

所變改造施吾為戮尸地下戮而重戮死而重死臣  
子為蔑死君父不忠不孝使死者有知將不福汝其  
以此詔藏之宗廟副在尚書祕書三府七年夏五月  
丁巳帝崩于嘉福殿六月戊寅葬首陽陵自殯及葬  
皆以終制從事

太平寰宇記魏文帝陵在偃師縣首陽山南

魏后妃傳文昭甄皇后賜死葬于鄴

王沈魏書曰有司奏建長秋宮

帝璽書迎后會后疾篤崩于鄴  
帝哀痛咨嗟策贈皇后璽綬

文德郭皇后葬首

陽陵西

明帝高平陵

魏志景初三年春正月丁亥帝崩于嘉福殿癸丑葬

高平陵

魏后妃傳明悼毛皇后葬愍陵 明元郭皇后葬高

平陵西

高貴鄉公墓

漢晉春秋丁卯葬高貴鄉公于洛陽西北三十里漣

澗之濱下車數乘不設旌旄百姓擁聚而觀之曰是  
前日所殺天子也或掩面而泣悲不自勝

薛收元經傳漢故事陵上立祭殿至魏制以謂古不  
墓祭自有廟設於是園邑寢殿遂廢

吳武烈帝高陵

吳志權正尊號謚堅曰武烈皇帝

吳錄尊堅廟曰始祖墓曰高陵

吳妃嬪傳吳夫人吳主權母也合葬高陵

大帝蔣陵

吳志神鳳元年夏四月權薨秋七月葬蔣陵

丹陽記蔣陵因山為名

元和郡縣志蔣陵在上元縣北二十二里

太平寰宇記吳大帝陵在上元縣東北蔣山南八里

六朝事迹今蔣子文廟相對向西有曰孫陵岡是為蔣陵赤烏元年追拜夫人步氏為皇后後合葬蔣陵今蔣廟西南孫陵岡上有步夫人墩墩之側有夫人



冢乃其地也

吳妃嬪傳南陽王夫人生休出居公安卒因葬焉休  
即位追尊曰敬懷皇后改葬敬陵潘夫人生亮亦烏  
十三年立為太子明年立夫人為皇后薨合葬蔣陵  
嗣主亮墓

吳錄晉太康中吳故少府丹陽戴顓迎亮喪葬之賴  
鄉

景帝定陵

吳志永安七年秋七月癸未休薨謚曰景皇帝

吳妃嬪傳朱夫人永安五年立為皇后甘露元年七月薨合葬定陵

朱彝尊曰吳志不言定陵所在順治中海寧邵灣山居民穴地得隧道行數百步道窮有碑乃孫休陵也治銅為門門有獸鏤兩狻猊夾門左右堅不可入未發而為怨家所首亟以土掩之此地志所不載也

### 文帝明陵

吳志元興元年九月追謚父和曰文皇帝

吳錄皓初尊和為昭獻皇帝俄改曰文皇帝

太平寰宇記烏程縣西陵山吳興地記云孫皓改葬父和於此號曰明陵即卞山之別嶺也

晉宣帝高原陵

晉書宣皇帝魏嘉平三年秋八月戊寅崩于京師九月庚申葬于河陰先是預作終制於首陽山為土藏不墳不樹作顧命三篇斂以時服不設明器後終者不得合葬

晉后妃傳宣穆張皇后葬洛陽高原陵

景帝峻平陵

晉書景皇帝魏正元二年閏二月辛亥崩于許昌武帝受禪上尊號曰景皇帝陵曰峻平

太平寰宇記晉景帝陵在河清縣南三十里高六丈四尺

晉后妃傳景懷夏侯皇后青龍二年崩葬峻平陵

景獻羊皇后咸寧四年崩祔葬峻平陵

文帝崇陽陵

晉書文帝咸熙二年秋八月辛卯崩于露寢九月癸酉葬崇陽陵

元帝太興二年正月丁卯崇陽陵毀帝素服哭三日  
晉后妃傳文明王皇后泰始四年崩合葬崇陽陵  
武帝峻陽陵

晉書泰始二年冬十月丁未詔曰昔舜葬蒼梧農不  
易畝禹葬成紀市不改肆上惟祖宗清簡之旨所徙  
陵十里內居人動為煩擾一切停之太熙元年夏四

月己酉帝崩于含章殿五月辛未葬峻陽陵

晉后妃傳武元楊皇后泰始十年崩于明光殿葬于峻陽陵

惠帝太陽陵

晉書光熙元年十一月庚午帝崩于顯陽殿十二月己酉葬太陽陵

元帝太興二年五月癸丑太陽陵毀帝素服哭三日東晉元帝建平陵

晉書永昌元年閏十一月己丑帝崩于內殿太寧元年二月葬建平陵

建康實錄元帝陵在雞籠山之陽不起墳

元和郡縣志元帝建平陵明帝武平陵成帝興平陵並在上元縣北六里雞籠山

晉后妃傳元敬虞皇后永嘉六年薨大興三年冊贈皇后祔于太廟葬建平陵

明帝武平陵

晉書太寧三年閏八月戊子帝崩于東堂九月辛丑葬武平陵

建康實錄武平陵在雞籠山之陽不起墳

成帝興平陵

晉書咸康八年夏六月癸巳帝崩于西堂秋七月丙

辰葬興平陵

建康實錄興平陵在雞籠山之陽與元帝同處不起

墳



晉書本紀咸康七年三月戊戌杜皇后崩夏四月丁卯葬恭皇后于興平陵

晉后妃傳成恭杜皇后崩帝下詔曰吉凶典禮誠宜備設然豐約之度亦當隨時況重壤之下而崇飾無用邪今山陵之事一從節儉陵中惟潔埽而已

康帝崇平陵

晉書建元二年八月戊戌帝崩于式乾殿冬十月乙丑葬崇平陵

建康實錄崇平陵隸鍾山之陽不起墳

元和郡縣志崇平陵在上元縣東北二十里蔣山西南

穆帝永平陵

晉書升平五年五月丁巳帝崩于顯陽殿秋七月戊午葬永平陵

江道傳穆帝崩山陵將用寶器道諫曰以宣皇顧命終制山陵不設明器以貽後則景帝奉遵遺制逮文

明皇后崩武皇亦承前制無所施設惟脯糒之奠瓦器而已昔康皇帝玄宮始用寶劍金罍此蓋太妃罔已之情實違先旨累世之法今外欲以為故事臣請述先旨停此二物書奏從之

建康實錄永平陵隸幕府山之陽起墳今幕府山前近西里俗相傳有穆天子墳即其地也

### 哀帝安平陵

晉書興寧三年春正月丙申帝崩于西堂三月壬申

葬安平陵

建康實錄安平陵隸雞籠山之陽不起墳

元和郡縣志安平陵在上元縣北六里雞籠山陽

廢帝吳陵

晉書后妃傳廢帝孝庾皇后太和六年崩葬于敬平

陵帝廢為海西公太元九年海西公薨于吳又以后

合葬于吳陵

簡文帝高平陵

晉書咸安二年秋七月乙未帝崩于東堂冬十月丁卯葬高平陵

建康實錄高平陵在鍾山之陽不起墳

元和郡縣志簡文帝高平陵孝武帝隆平陵安帝休平陵恭帝沖平陵並在上元縣東北二十里蔣山西南

晉后妃傳簡文順王皇后永和四年薨孝武帝即位追尊曰順皇后合葬高平陵

孝武帝隆平陵

晉書太元二十一年秋九月庚申帝崩于清暑殿冬十月甲申葬隆平陵

建康實錄隆平陵在鍾山之陽不起墳

晉后妃傳孝武定王皇后太元五年崩葬隆平陵  
安帝休平陵

晉書義熙十四年十二月戊寅帝崩于東堂元熙元年春正月庚申葬休平陵

建康實錄休平陵在鍾山之陽不起墳

晉后妃傳安僖王皇后義熙八年崩于徽音殿葬休平陵

恭帝沖平陵

晉書元熙二年夏六月禪位居于秣陵宋永初二年九月丁卯弒于內房葬沖平陵

建康實錄沖平陵在鍾山之陽安帝同處不起墳

晉后妃傳恭思褚皇后宋元嘉十三年崩祔葬沖平

陵

附

顯平陵

晉后妃傳謝夫人生愍懷太子拜為淑媛被害永康  
初詔贈夫人印綬葬顯平陵

愍懷太子傳愍懷太子適惠帝長子惠帝即位立為  
皇太子元康九年廢為庶人賈后使黃門孫慮以藥  
杵椎殺之賈庶人死冊復太子葬于顯平陵

嘉平陵



晉后妃傳簡文宣鄭太后生簡文帝咸和元年薨簡文帝即位未及追尊太元十九年孝武帝上太妃尊號曰簡文太后立廟於太廟路西陵曰嘉平

脩平陵

晉后妃傳孝武文李太后生孝武帝太元十九年尊為皇太后安帝即位尊為太皇太后隆安四年崩葬脩平陵

熙平陵

晉后妃傳安德陳太后生安恭二帝太元十五年薨  
追崇曰皇太后陵曰熙平

前趙永光陵

晉載記劉元海以永嘉四年死偽謚光文皇帝墓號  
永光陵

十六國春秋劉淵僭即皇帝位河瑞元年薨于光極  
殿九月葬永光陵

宣光陵

十六國春秋聰薨于建始殿葬宣光陵謚曰昭武皇帝

後趙高平陵

晉載記石勒以咸和七年死夜瘞山谷莫知其所備  
文物虛葬號高平陵

顯原陵

晉載記石季龍偽謚武皇帝號其墓為顯原陵

前燕龍平陵

十六國春秋慕容皝薨于承乾殿葬龍山雋追尊曰

文明皇帝陵曰龍平

龍陵

晉載記升平四年慕容儁死偽謚景昭皇帝墓號龍陵

後燕宣平陵

晉載記慕容垂以太元二十一年死偽謚成武皇帝墓曰宣平陵

興平陵

晉載記慕容盛死偽謚昭武皇帝墓號興平陵是歲隆安五年也

衡平陵

十六國春秋慕容熙葬衡平陵謚曰昭文皇帝

南燕東陽陵

十六國春秋慕容德薨于顯安宮為十餘棺夜分出四門潛瘞山谷莫知其尸所在虛葬於東陽陵謚獻

武皇帝

北燕長谷陵

十六國春秋馮跋薨葬長谷陵偽謚文成皇帝

前秦原陵

十六國春秋苻健薨于太極前殿葬原陵偽謚明皇

帝永興初追尊曰景明皇帝

後秦高陵

晉載記姚弋仲卒柩為苻生所得生以王禮葬之于

天水冀縣姚萇僭位追謚曰景元皇帝墓曰高陵置園邑五百家

原陵

晉載記姚萇以太元十八年死偽謚武昭皇帝墓稱

原陵

偶陵

晉載記義熙十二年姚興死偽謚文桓皇帝墓曰偶

陵

西秦枹罕陵

十六國春秋乞伏乾歸敗于五谿山為兄子公府所殺八月熾盤葬乾歸于枹罕陵偽謚武元王

武平陵

十六國春秋乞伏熾盤薨葬武平陵謚文昭王

蜀安都陵

華陽國志咸和九年六月癸亥李雄卒偽謚曰武帝冬十二月丙寅葬成都墓號安都陵



安昌陵

晉載記咸康八年李壽死偽謚昭文帝墓曰安昌陵  
前涼建陵

十六國春秋涼州牧張軌薨葬建陵張祚僭號追尊  
武王

大陵

十六國春秋張駿薨于正德前殿葬大陵張祚僭號  
追尊文王

顯陵

十六國春秋張重華薨于平章殿葬顯陵張祚僭號

追謚桓王

愍陵

十六國春秋張祚僭即王位為厨士徐里所殺天錫

即位備禮葬于愍陵

平陵

十六國春秋張元靖葬平陵謚沖王

西涼建世陵

十六國春秋李暠薨于恭德殿葬建世陵謚武昭王  
元和郡縣志西涼武昭王陵在酒泉縣西十五里

後涼高陵

十六國春秋呂光薨葬高陵謚武皇帝

白石陵

晉載記呂纂以元興元年死偽謚靈皇帝墓號白石  
陵

北涼元陵

十六國春秋沮渠蒙遜義和三年夏四月薨五月葬  
元陵謚武宣王

南涼西平陵

晉載記禿髮利鹿孤死葬于西平之東南  
十六國春秋利鹿孤薨謚康王葬西平陵

夏嘉平陵

崔鴻三十國春秋夏錄赫連昌發二百里內民二萬

五千人鑿嘉平陵七千人繕清廟于契吳初昌父勃  
北遊契吳昇高而嘆曰美哉斯阜臨廣澤而帶清流  
吾行地多矣未有若斯之美昌以勃平昔之意也故  
立廟焉葬勃于城西十五里起行宮模寫統萬宮殿  
飾以金銀珠璣葬訖焚之殺駿馬數十匹

十六國春秋赫連勃勃薨于永安殿謚武烈皇帝葬  
嘉平陵

乾學案十六國主乘亂僭竊葬地不足書附

錄之以備考古之士稽覽五代十國倣此

宋穆帝興寧陵

宋書武帝永初元年夏六月追尊皇考為孝穆皇帝  
皇妣為穆皇后

元經薛氏傳宋高祖之考墓在侯山其地秦史所謂  
曲阿丹徒有天子氣者也

宋后妃傳孝穆趙皇后生高祖其日以產疾殂葬晉  
陵丹徒縣東鄉練壁里雩山宋初追崇號謚陵曰興

寧 孝懿蕭皇后考穆后殂孝皇帝聘為繼室景平  
元年崩于顯陽殿遺令曰孝皇背世五十餘年古不  
祔葬且漢世帝后陵皆異處今可於塋域之內別為  
一壙孝皇陵墳本用素門之禮與王者制度奢儉不  
同婦人禮有所從可一遵往式乃開別壙與興寧陵  
合墳

武帝初寧陵

宋書永初三年五月癸亥上崩于西殿秋七月己酉

葬丹陽建康縣蔣山初寧陵

建康實錄初寧陵隸丹陽建康縣蔣山圖經云在縣東北二十里

元和郡縣志初寧陵在上元縣東北二十二里

六朝事迹政和間有人於蔣山廟側得一石柱題云初寧陵西北隅以此考之其墳當去蔣廟不遠

宋后妃傳武敬臧皇后義熙四年殂于東城還葬丹徒高祖臨崩遺詔留葬京師於是備法駕迎梓宮祔



葬初寧陵

文帝長寧陵

宋書元嘉三十年二月甲子上崩于含章殿三月癸巳葬長寧陵

圖經長寧陵隸建安縣東北二十五里與武帝陵相近今未詳所在

元和郡縣志長寧陵在上元縣東北二十二里

集古錄宋文帝神道碑書太祖文皇帝之神道凡八

大字而別無文辭惟以此為表識爾古人刻碑正當如此後世鐫刻功德爵里世系惟恐不詳矣

南史元嘉十七年葬先皇后袁氏于長寧陵

孝武帝景寧陵

宋書大明八年閏五月庚申帝崩于玉燭殿秋七月丙午葬丹陽秣陵縣巖山景寧陵

元和郡縣志景寧陵在上元縣西南四十里巖山

宋后妃傳文穆皇后生廢帝崩于含章殿祔葬景寧

陵

宋書前廢帝何皇后與廢帝合葬龍山北

明帝高寧陵

宋書泰豫元年夏四月己亥上崩于景福殿五月戊寅葬臨沂縣幕府山高寧陵

元和郡縣志高寧陵在上元縣北十九里幕府山東南

六朝事迹高寧陵隸臨沂縣幕府山西與王導墳相

近今山前有墳隴晉穆帝陵在山南或以西為明帝之墓

順帝遂寧陵

宋書昇明三年四月帝禪位於齊建元元年五月己未殂于丹陽宮六月乙酉葬于遂寧陵

附

熙寧陵

宋后妃傳武帝胡婕妤生文帝被譴賜死葬丹徒太祖即位上尊號曰章皇太后陵曰熙寧

脩寧陵

宋后妃傳文帝路淑媛生孝武帝上即位尊號曰皇太后太宗踐祚號崇憲太后崩謚曰昭皇太后葬世祖陵東南號曰脩寧陵

崇寧陵

宋后妃傳文帝沈婕妤生明帝元嘉三十年卒葬建康之幕府山太宗即位上尊號為皇太后謚曰宣陵號曰崇寧

六朝事迹今寶林寺西南有墳隴相傳為國婆墳疑  
即沈后所葬之地

南齊宣帝休安陵

元和郡縣志休安陵在丹陽縣北二十八里宣帝高  
帝父也建元元年十二月追尊為宣皇帝

高帝泰安陵

南齊書建元四年三月壬戌上崩于臨光殿四月庚  
寅上謚曰太祖高皇帝奉梓宮於東府前渚升龍舟

丙午窆武進泰安陵

元和郡縣志泰安陵在丹陽縣東三十一里

齊皇后傳高昭劉皇后宋泰豫元年殂歸葬宣帝墓側今泰安陵也

武帝景安陵

南齊書永明十一年秋七月上不豫戊寅大漸詔曰我識滅之後身上著夏衣畫天衣純烏犀導應諸器悉不得用寶物及織成等惟裝複袂衣各一本通常

所服身刀長短二口鐵環者隨我入梓宮陵墓萬世  
所宅意常恨休安陵未稱今可用東三處地最東邊  
以葬我名為景安陵喪禮每存省約不須煩民是日  
崩九月丙寅葬景安陵

元和郡縣志景安陵在丹陽縣東三十二里  
齊皇后傳武穆裴皇后葬休安陵

文帝崇安陵

南齊書文惠太子葬崇安陵鬱林王立追尊為文帝



廟稱太宗

齊皇后傳文安王皇后葬崇安陵

景帝脩安陵

元和郡縣志永

南齊書作脩

安陵在丹陽縣東北二十六

里明帝父也

海陵恭王墓

南齊書海陵恭王文惠太子第二子也延興元年秋七月即皇帝位冬十月降封海陵王葬依東海王故

事

夢溪筆談慶厯中予在金陵饗人以一方石鎮肉視之若有鐫刻取石洗濯乃海陵王墓銘謝朓撰并書其字如鍾繇極可愛予攜之十餘年文思副使夏元昭借去託以墮水今不知落何處

東觀餘論海陵誌在沈翰林括家為人借去遂亡所  
在今殊難得沈云謝朓撰并書而誌但云朓立耳然  
朓自以草隸名當時後人目以飛花滿目殘霞照人

此誌結字高雅必眇書也

明帝興安陵

南齊書永泰元年秋七月己酉帝崩于正福殿葬興安陵

元和郡縣志興安陵在丹陽縣東北二十四里

齊皇后傳明敬劉皇后永明七年卒葬江乘縣張山永泰元年高宗崩改葬祔于興安陵

和帝恭安陵

南齊書中興二年薨葬恭安陵

梁文帝建寧陵

元和郡縣志梁文帝建寧陵在丹陽縣東二十五里  
武帝父也

梁后妃傳太祖獻皇后張氏宋泰始七年殂于祿陵  
縣同夏里舍葬武進縣東城里山

武帝脩陵

梁書太清三年五月丙辰高祖崩于淨居殿十一月

乙卯葬于脩陵

元和郡縣志脩陵在丹陽縣東三十一里貞觀十一年詔令百步禁樵採

梁后妃傳高祖德皇后郗氏永元元年八月殂于襄陽官舍其年歸葬南徐州南東海武進縣東城里山陵曰脩陵

簡文帝莊陵

梁書大寶二年八月侯景廢太宗為晉安王幽于永

福省冬十月壬寅崩明年三月王僧辯率百官奉梓宮升朝堂四月乙丑葬莊陵

元和郡縣志莊陵在丹陽縣東二十七里

梁后妃傳太宗簡皇后王氏太清三年三月薨大寶元年九月葬莊陵先是詔曰簡皇后窀穸有期昔西京霸陵因山為藏東漢壽陵流水而已朕屬值時艱歲饑民敝方欲以身率下永示敦朴今所營莊陵務存約儉

附

安寧陵

梁書昭明太子統大通三年四月乙巳薨高祖幸東宮臨哭盡哀詔斂以袞冕五月庚寅葬安寧陵

陳景帝瑞陵

陳書永定元年冬十月追尊皇考曰景皇帝皇妣董太夫人曰安皇后癸未尊景帝陵曰瑞陵

武帝萬安陵

陳書永定三年六月丙午帝崩于璿璣殿秋八月丙

申葬萬安陵

建康實錄陵隸縣東南古彭城驛側

元和郡縣志萬安陵在上元縣東三十八里方山西  
北貞觀十一年詔百步內禁樵採

六朝事迹今縣東崇禮鄉地名陵里曰天子林其地  
有石麒麟二里俗相傳即陳高祖墓也去城二十五  
里

陳皇后傳高祖宣皇后章氏太建二年崩祔葬萬安



陵

文帝永寧陵

陳書天康元年夏四月癸酉世祖崩于有覺殿六月  
丙寅葬永寧陵

元和郡縣志永寧陵在上元縣東北四十里蔣山東  
北

六朝事迹陵隸縣東北陵山之南今燕門山之北

宣帝顯寧陵

陳書太建十四年春正月甲寅帝崩于宣福殿遺詔  
金銀之飾不須入塋明器之具皆令用瓦二月癸巳  
葬顯寧陵

元和郡縣志顯寧陵在上元縣南四十里牛頭山西  
北

附  
嘉陵

陳書永定元年追謚前夫人錢氏號為昭皇后陵曰  
嘉陵

北魏昭成帝金陵

魏書建國三十九年十一月帝不豫十二月至雲中  
旬有二日帝崩葬金陵營梓宮木槨盡生成林

魏皇后傳獻明皇后賀氏生太祖皇始元年崩祔葬  
于盛樂金陵

道武帝金陵

魏書天賜六年冬十月戊辰帝崩于天安殿永興二  
年九月甲寅葬于盛樂金陵

明元帝金陵

魏書泰常八年十有一月己巳帝崩于西宮十二月  
庚子葬于雲中金陵

魏皇后傳密皇后杜氏生世祖太宗即位拜貴嬪泰  
常五年薨謚曰密葬雲中金陵世祖即位追尊號謚  
太武帝金陵

魏書正平二年三月甲寅帝崩于永安宮辛卯葬于  
雲中金陵

魏皇后傳太武皇后赫連氏高宗初崩祔葬金陵

敬哀皇后賀氏生恭宗神麀元年薨追贈貴嬪葬雲

中金陵後追加號謚

景穆恭皇后郁久閭氏生高宗世祖末年薨高宗即

位追尊號謚葬雲中金陵

文成帝金陵

魏書和平六年五月癸卯帝崩于太華殿八月葬雲

中之金陵

魏皇后傳元皇后李氏生顯祖拜貴人後謚曰元皇后葬金陵

獻文帝金陵

魏書皇興五年八月冊命太子踐位上尊號太上皇帝承明元年崩于永安殿葬雲中金陵

魏皇后傳思皇后李氏生高祖皇興三年薨葬金陵金陵陪葬諸臣

江夏王拓跋呂

尚安康公拓跋素

彭城公拓跋勃

長樂王拓跋處文

任城康王拓跋雲

趙郡靈王拓跋幹

隴西獻王姚黃眉

上黨定王長孫觀

藍田武侯長孫肥

平陽威王長孫翰

平陽公長孫平成

吳郡恭王長孫陳

城陽公奚烏侯

丹陽襄王叔孫建

宣城忠貞王車路頭

瑯琊貞王司馬楚之

平原簡王陸麗

隴西宣王源賀

趙郡康公羅拔

乾學案魏自昭成帝至獻文帝或葬盛樂或葬雲中統名曰金陵功臣陪葬載於國史者具書於此

孝文帝長陵

魏書太和二十三年夏四月丙午帝崩于穀塘原之行宮至魯陽發哀還京師五月丙申葬長陵

魏皇后傳孝文貞皇后林氏葬金陵 幽皇后馮氏



葬長陵塋內 昭皇后高氏先葬城西長陵東南陵  
制卑局因就起山陵號終寧陵置邑戶五百家肅宗  
遷靈櫬於長陵兆西北六十步

宣武帝景陵

魏書延昌四年春正月甲寅帝不豫丁巳崩于式乾  
殿二月甲午葬景陵

孝明帝定陵

魏書武泰元年二月癸丑帝崩于顯陽殿三月乙酉

葬靜陵

孝莊帝靜陵

魏書永安三年十有二月甲寅尒朱兆遷帝于晉陽  
甲子崩于城內三級佛寺中興二年謚為武懷皇帝  
太昌元年又謚孝莊皇帝十一月葬定陵

後廢帝墓

魏書後廢帝殂于門下外省永熙二年葬于鄴西南  
野馬岡

孝靜帝墓

魏書孝靜帝遜位於齊天保二年十二月殂三年二月葬于漳西山岡

附  
永固陵

魏后妃傳文明皇后馮氏承明元年尊曰太皇太后太后與高祖遊於方山顧瞻川阜有終焉之意因謂羣臣曰舜葬蒼梧二妃不從豈必遠祔山陵然後為貴哉吾百年之後神其安此高祖乃詔有司營建壽

陵於方山又起永固石室將終為清廟焉太和五年起作八年而成刊石立碑頌太后功德十四年崩于太和殿謚曰文明太皇太后葬于永固陵日中而反虞于鑒玄殿詔曰尊旨崇儉不申罔極之痛稱情允禮仰損儉訓之德進退思惟倍用崩感又山陵之節亦有成命內則方丈外裁揜坎脫於孝子之心有所不盡者室中可二丈墳不得過三十餘步今以山陵萬世所仰復廣為六十步辜負遺旨益以痛絕其幽

房大小棺槨質約不設明器至於素帳繆茵瓷瓦之物亦皆不置此則遵先志從冊令俱奉遺事而有從有違未達者或以致怪梓宮之裏玄堂之內聖靈所憑是以一一奉遵仰昭儉德其餘外事有所不從以盡痛慕之情其宣示遠近著告羣司上明儉誨之善下彰違命之失初高祖孝於太后乃於永固陵東北里餘豫營壽宮有終焉瞻望之志及遷洛陽乃自表瀍西以為山園之所而方山虛宮至今猶存號曰萬

年堂云

水經注羊水又東注於如渾水亂流逕方嶺上有文  
明太皇太后陵陵之東北有高祖陵二陵之南有永  
固堂堂之四周隅雉列榭階闌檻及扉戶梁壁椽瓦  
皆文石也檐前四柱采洛陽之八風谷黑石為之雕  
鏤隱起以金銀間雲雉有若錦焉堂之內外四側結  
兩石扶帳青石屏風以文石為椽並隱起忠孝之容  
題刻貞順之名廟前鐫石為碑獸碑不至佳左右列

柏四周迷禽閣石院外西側有思遠靈圖圖之西有齋堂南門表二石闕闕下斬山累結御路下望靈泉宮池皎若圓鏡矣

永泰陵

魏皇后傳宣武順皇后于氏崩葬永泰陵

北齊神武帝義平陵

北齊書武定五年正月丙午神武崩于晉陽謚獻武王八月甲申葬于鄴西北漳水之西天保初追謚為

獻武帝陵曰義平天統元年改謚神武皇帝

元和郡縣志神武陵在滏陽縣南三里

太平寰宇記高齊神武陵去縣三里今有天鹿石闕

尚存

北齊皇后傳神武明皇后婁氏太寧二年四月崩于

北宮五月甲申合葬義平陵

文襄帝峻成陵

北齊書王還晉陽遇盜而殂葬于峻成陵齊受禪追



謚為文襄皇帝

北齊皇后傳文襄敬皇后元氏魏孝靜帝之妹也封  
馮翊公主歸於文襄文宣受禪尊為文襄皇后武平  
中后崩祔葬義平陵

乾學案義平陵恐是峻成陵

文宣帝武寧陵

北齊書天保十年冬十月甲午帝暴崩于晉陽宮德  
陽堂十一月辛未梓宮還京師十二月乙酉殯于太

極前殿乾明元年二月丙申葬于武寧陵

閔悼王墓

北齊書皇建二年九月王薨大寧二年葬于武寧陵  
之西北謚閔悼王

孝昭帝文靖陵

北齊書皇建二年十一月帝崩于晉陽宮大寧元年

閏十二月癸卯梓宮還鄴庚午葬于文靖陵

武成帝永平陵

北齊書河清四年夏四月傳位於皇太子天統四年十二月辛未太上皇帝崩于鄴宮乾壽堂二月甲申葬于永平陵

後周文帝成陵

後周書魏恭帝三年夏太祖北巡狩九月有疾還至雲陽冬十月乙亥崩于雲陽宮還長安發喪甲申葬于成陵武成元年追尊為文皇帝

後周皇后傳文帝元皇后生孝閔帝大統七年薨魏

恭帝三年十二月合葬成陵武成初追尊為皇后

元和郡縣志後周文帝成陵在富平縣西北十五里

孝閔帝靜陵

後周書魏恭帝三年十二月魏帝詔以岐陽之地封  
帝為周公庚子禪位於帝元年春正月即天王位九  
月晉公護逼帝遜位幽於舊邸以弑崩及武帝誅護  
上謚曰孝閔皇帝陵曰靜

明帝昭陵

後周書武成二年夏四月庚子大漸詔曰朕稟生儉  
素非能力行菲薄每寢大布之被服大帛之衣凡是  
器用皆無雕刻身終之日豈容違棄此好喪事所須  
務從儉約斂以時服勿使有金玉之飾若以禮不可  
闕皆令用瓦葬日選擇不毛之地因地勢為墳勿封  
勿樹且厚葬傷生聖人所誡朕既服膺聖人之教安  
敢違之凡百官司勿異朕此意辛丑崩于延壽殿五  
月辛未葬于昭陵

後周皇后傳獨孤皇后世宗崩與后合葬

武帝孝陵

後周書宣政元年五月己丑帝總戎北伐癸巳帝不  
豫止于雲陽宮六月丁酉夜崩于乘輿遺詔曰朕平  
生居處每存菲薄非直以訓子孫亦乃本心所好喪  
事資用須使儉而合禮墓而不墳自古通典隨吉即  
葬葬訖公除妃嬪以下無子者悉放還家己未葬于  
孝陵

後周皇后傳武帝阿史那皇后靜帝尊為太皇太后  
隋開皇二年殂隋文帝詔有司備禮冊祔葬孝陵

宣帝定陵

後周書大象二年五月薨于天德殿七月丙申葬定  
陵

後周皇后傳宣帝楊皇后隋文帝長女大業五年從  
煬帝幸張掖殂于河西煬帝還京詔有司備禮祔葬  
后于定陵

靜帝恭陵

後周書大定元年隋王楊堅稱尊號帝遜于別宮開  
皇元年五月壬申崩謚曰靜皇帝葬恭陵

隋文帝太陵

隋書仁壽二年八月己巳皇后獨孤氏崩閏十月壬  
寅葬獻皇后于太陵四年秋七月丁未帝崩于太寶  
殿冬十月己卯合葬于太陵同墳而異穴  
文獻通考士庶赴葬者皆聽入視陵內



元和郡縣志隋文帝太陵在武縣西南二十里三時  
原上


合璧事類隋文帝仁壽二年皇后獨孤氏崩上令儀  
同三司蕭吉為皇后擇葬地得吉處云卜年二千卜  
世二百上曰吉凶由人不在於地高緯葬父豈不卜  
乎俄而國亡正如我家墓田若云不吉朕不當為天  
子若云不凶我弟不當戰沒然竟從吉言吉退告族  
人蕭平仲曰後四載太子御天下若太子得政隋其

亡乎吾前給之云卜年二千者二十字也卜世二百者取世二傳也

煬帝墓

隋書大業十三年十一月唐公入京師遙尊帝為太上皇立代王侑為帝改元義寧二年三月右屯衛將軍宇文文化及等以驍果作亂入犯宮闈上崩于溫室蕭后令宮人撤牀簀為棺以埋之化及發後右禦衛將軍陳稜奉梓宮于成象殿葬吳公臺下唐平江南

之後改葬雷塘



讀禮通考卷八十九